

BISMI LAAHI RAHMAANI RAHIMI

1966

"Marsiya" Mam Baabakar Laay

1. Alhamdu li Laahi gëm Buur Yàla war na
Te gëm dogalam ya ndéém sunu diine wér na
2. Li Yàlla dogal ci ab jaamam manul jaas
Di nay am faw ndax àtteem ba daw na
3. Lu jiitu amuk mbindééf yi ci ay junniy at
La Yàlla dogal dogal ya te loolu wér na
4. Ba looloo tax lu Yàlla dogal ci ab jaam
Du deñ ci pexeem mbindééf ndéém Yàlla bañ na
5. Xanaa mootax sërĩn Mbay Baabakar Laay
Di bàyyi njaboot gi nii baña took "xuruunaa"
6. Demam gee bett waa dunyaa ci mbooleem
Ñi xam Baay Baabakar seen xol lëndëm na
7. Laayeen goo xamne amatul Seydinaa Mbay
Xanaa asamaan su amatul jànt xam naa
8. Fu nuy làqooti, moo fu nu deeti daw jëm
Ka doon yaakaari àdina jépp dem na
9. Mbindééf la mu Yàlla amaloon ngir ga aajoy
Mbindééf yi ku jaaxle waa ba jubal fa raw na
10. Ba looloo tax turëm wa demoon ba Kodiwaar
Ba jàlla Gineeki Gànnar fépp siiw na
11. Te ndamba la woon bu feeñoon fii ci Kap weer
Te doon meññant ci Mahdiyu loolu wér na
12. Nanguk ñaan ak fajuk aajoo ki feebar
donoom ci Limaamu Laay la te loolu sax na
13. Fu nuy xoleeti Baay Laay ciw meloom ak
Doxin waak, wax ju xumba ja, nir wa dem na
14. Adina yaa di ab workat nde koon kay
Nga àndak Baabakar mu jariñ jamaana
15. Bu fekkoon dee lu nuy mana jot la koon kay
Nu jot ko ci ruuyu doy ba du faatu "laana"
16. Waxal neel gééj la woon gu di fuur ci xamxam
ci "saahir" ak ci "baatin" loolu wér na
17. "fiq" aaki "luxaak, nēhwuk taarix, haruud" ak
"Bayaan, siira" ak, "adiis, tafsiir Xuraanaa"
18. Bu daan adiis ci lenn ci yii da ngay yéém
Te àndak xol bu fééx ba nga naa rafet na

19. Limaamul Mahdiyoo ko soloon ci baatin
Ci gééji "hikam" la duy ba ndabam fengat na
20. Ca leetar yooya Baay Laay jàngaloo woon
Sëriñ Mbay Caw kerook la ko sol ba raw na
21. Ba Baay Laay naa ka Mbay kula laaj sa meetar
Ci xamxam neel Limaamu sangub jamaana
22. Ku lay laaj meetarub Baay Laay waxal neel
Xanaa Buur Yàlla Rabbul aalamina
23. Sëriñ Mbay daa na nettali lii "miraaran"
Ba moo tax xamxamam ku ka xam ne yay na
24. Ku xam Baay Laay te xam Baay Mbay te gis ka
Di nay tiit cik demam ndéém xol ba yiw na
25. Malaaka yi sax xécóó na ñu ruu ga ñu naan
na dem tey ñii ne bu mu dem fan wi des na
26. Kerook Baay Mbay xémóón na ba dellu ximmi naan
man dey gis naa ludul jaas dik bi ñëw na
27. Limaamoo ngii di may woo faw dinaa dem
Malaaka yi ñooy werante nde saa si jot na
28. Ci at mudi "wafasasin" ci gàdaayuk Yonnen
la Baay Mbay fekki Baay Laay illa yiina
29. Ci weer wudi maamu koor "kahnu" ca weer wa
Ca altiné loolu mooy "taarix" ba wér na
30. Kerook bañu nee sëriñ Mbay Caw nelaw na
ku xam Baay Mbay bu sella xolam lëndëm na
31. Malaaka ya nekk kaw asamaaw yi jooy na
ngireek ruuham ga leen romboon ba wéy na
32. "jibaalu" yi ak "buhuru" gééj gi jooy na
Ba jën ya ca biir di sàbbal mbër nelaw na
33. Garab yeek suuf si ak asamaan yi jooy na
ci ak faatoom kudul kok xol ba dee na
34. Nabee noon waaju am xamxam bu faatoo
ku tiitul moodi ab naa féq wér na
35. Te ab naaféq "jahanama" moodi néégam
ëllëg ca la jëm ca asfala saafiliina
36. "Nahuuzu bi Laahi" yalnanu Yàlla jàmmal
Te xiir nu ci topp yoon wa nga xamne wër na
37. Xarit yow kaay ñu waxtaan seetlu dunyaa
Xalam ni mu def ñoñam ndax xellu jot na

38. Bu àdina doon kërub béél kay dinay yor
Ñu baax ñi fi jiituwoon du ñu jók jamaana
39. Yonnenta yi Yàlla daan wahyóók ñu baax ñaak
ña doon waliyook saaba ya ñépp dem na
40. Amoon na ñu Yàlla jay def leen ñu diy buur
demon ba di naagu tey seen yax fënëx na
41. Ña Yàlla jayoon ñu moom dunyaa ca perikook
Sawook mbooleem digënté ñépp dem na
42. Dammeel yi fi woon Baraak yaak Teeñ ya ak seen
jaraaf yaak dak ya tey ñii ñépp dem na
43. Ñu baax ñii fi daan dundël lilaam ci dunyaa
ku melni Limaamu, ak seex Bamba Seexnaa
44. Te mooy seex Saadibook, alhaaji Maalik
ka jappe mbiram ca seexu Omar Kamaal na
45. Al haaji Omar ma daa xeex ngir ga lislam
“Kazaa” Alhaaji Ablaay Ñas jiyaar na
46. Sëriñ Canaba ak Sëriñ Buu Kunta ñii ñépp
Ñu baax la ñu woon te tey ku ci nekk dem na
47. Bu àdina doon kërub béél kay di nay yor
Rasuulu Laahi konte du jók jamaana
48. Bu àdina doon kërub béél kay di nay yor
Saaba Rasuulu Laahi ña am “lamaana”
49. Bu àdina doon kërub béél kay di nay yor
Limaa mu Laahi koon di nay sax “xuruunaa”
50. Bu àdina doon kërub béél kay di nay yor
Isaa Ruuhul Ilaahi boroom jamaana
51. Bu àdina doon kërub béél kay Sërin Mbay
Di nay sax wuuf njaboot gi du faatu “laanaa”
52. Ilaahii yalna ngay taw niiru xéewël
Ca baay Mbay muy karaama ca ilayiina
53. Fa baay Mbay féété woon na fa Yàlla wuutal
Loxoom ak yërmëndeem bamu am “lamaanaa”
54. Te mey nu Manjoon mu sax ci njaboot gi yor leen
Nde koon dunu jaaxle moo di kamaal te doyna
55. Manjoon yaay waaju mat kula xam di nay ñaan
Sa fan wi di wéy di dem ba nga am “xuruunaa”
56. Te tey yaa fiy ku doon takandeeru Baay Laay
Ci góór ñi bu ken werante meyük Manjoonaa

57. Nu ngiy ñaan Yàlla bayyi la feek njaboot geek
Jullit ñépp ndax nga dekkal xolyi wéét naa
58. Nu ngiy ñaan Yàlla boole njaboot gi ciw yiw
Defal nu ci fépp fu nu jëm am lamaanaa
59. Dimmal nu ba képp koo gis muy saxoo naa,
Alhamdu li Laahi Rabbil aalamiina
60. Saxal nu ci diiné mey nun koom te bañ noo
Natoo cik beew wallak ñakkaak di sonna
61. Ilaahii noo gi lay ñaan sax ci liimaan
Bi jaai Imaami Laahi sàngub jamaana
62. "Salaatu Laahi zumma salaamu Rabbii
Alal muxtaari xayril aalamiina

BISMI LAAHI RAHMAANI RAHIIMI

"MARSIYA" SEYDINA MANJOON LAAY" 1970.

1. "Alhamdu li Laahi Rabbil xalxi" ciy dogalam
Li Yàlla def ci mbindééfam loolu moo wara am
2. Dogal ba jiitu na cib jaamam lu jëkk mu am
Atteem ba ken manu ko soppat ba tee ka mu am
3. Nan gëm te jël mbir yi jébbél Yàlla koon du nu juum
Te bañ di mer ak di tiit Yàllaay ki def li fi am
4. Moo tax ñu wommatu cib atteem ci jël gi mu jël
Seydina Manjoon Yàlla na féeroók yërmëndéék ngërëmam
5. La jël si Yonnent xayrul xalxi-koo ka du bàyyi deek
Ku am baken fii ci dunyaa yeefar ak ku di gëm
6. Ka jël si baayi Rasuulu Laahi Seydinaa
Du bayyi baayub mbindeef muy béél ci dun bi di dem
7. La yóbbu yaayi Rasuulu Laahi "saafihinaa"
Du bayyi kenn ndeyam sax fii di béél baña dem
8. Dunyaa dadul kër nde koon kay Yàlla Buur bi du def
Xayrul waraa ñëw ci dunyaa fii di doon ku jirim
9. Nan seet ci Yonnen bi ci tiis woo xamni dal na nu koon
Di nay oyof lu mu réy ndéém da noo ame ngëm
10. Yàllaa ne roy leen Rassulu Laahi roy gu rafet
Mbooleem ñi gëm Yàlla tey yaakar ci bés ba nu jëm
11. Adina yaa di kërub wor kay nde koon di nga yor
Rasuulu Laahi ba nu gis jëmmëm ja ak kanamam
12. Koo xaritool ak mujjam cim kan nga kay xala sóób
Mu rééré ak neen bu fekkul woon mu wóólu te gëm